

Na osnovu čl.10. i 12. Zakona o udruženjima i fondacijama BiH («Službeni glasnik BiH», broj: 32/01, 42/03 i 63/08) i čl. 22 Zakona o sportu u Bosni i Hercegovini («Službeni glasnik BiH» broj: 27/08), na osnivačkoj Skupštini održanoj dana 25.08.2008. godine u Zenici usvojen je :

STATUT RAGBI SAVEZA BOSNE I HERCEGOVINE

-Prečišćeni tekst-

I OPĆE ODREDBE

Član 1.

Ragbi savez Bosne i Hercegovine (u daljem tekstu: Savez) je osnovan Odlukom o osnivanju Ragbi saveza Bosne i Hercegovine, a na osnovu Odluke Ragbi saveza u Federaciji BiH broj: 5/08 od 25.08.2008. godine I Saglasnosti Ministarstva civilnih poslova BiH broj:11-35-10-3018-bč/08 od 20.08.2008. godine. Ragbi savez BiH nastavlja kontinuitet dosadašnjih aktivnosti svih oblika organizovanja Saveza, što je navedeno u posebnoj odluci Skupštine Saveza.

Član 2.

Ovim Statutom uređuje se:

1. naziv, skraćeni naziv Saveza i adresa Saveza;
2. ciljevi i djelatnosti Saveza;
3. postupak za primanje i isključivanje članova;
4. organe Saveza, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove Skupštinu, uslove i način raspuštanja, odnosno prestanka rada;
5. pravila za ostvarivanje, korištenje i raspolaganje sredstvima Saveza, kao i organ koji je ovlašten za nadzor nad korištenjem tih sredstava;
6. javnost rada Saveza;
7. postupak za izmjene i dopune Statuta, ovlaštenja i način donošenja drugih općih akata;
8. opis, oblik i sadržaj pečata;
9. zastupanje Saveza;
10. uslove i postupak za pripajanje, razdvajanje, transformaciju ili raspuštanje odnosno prestanak rada Saveza, uključujući i poseban kvorum i postizanje kvalifikovane većine u postupku glasanja;
11. postupak za raspolaganje preostalim imetkom ili drugim sredstvima u slučaju raspuštanja ili prestanka rada Saveza;
12. druga pitanja od značaja za organizaciju i djelovanje Saveza.

Član 3.

Savez je nevladina, nepolitička i neprofitna organizacija, koja na principu slobodnog i dobrovoljnog pristupanja u članstvo Saveza, okuplja svoje članove, radi razvoja i afirmacije sporta i ragbija na području BiH, te usklađivanjem zajedničkih interesa i ciljeva ragbi klubova.

Savez ima svojstvo pravnog lica sa pravima, obavezama i odgovornostima u skladu sa Zakonom i ovim Statutom, koje stiče upisom u registar nadležnog organa.

Savez ima svojstvo pravnog lica sa pravima, obavezama i odgovornostima u skladu sa Zakonom i ovim Statutom, koje stiče upisom u registar nadležnog organa.

Savez u pravnom prometu nastupa samostalno u svoje ime i u okviru svojih pravnih mogućnosti će obavljati pravne poslove.
Za obaveze u pravnom prometu Savez odgovara svojom cjelokupnom imovinom-potpuna odgovornost.

II NAZIV, SKRAĆENI NAZIV I SJEDIŠTE SAVEZA

Član 4.

Naziv Saveza je:

Ragbi savez Bosne i Hercegovine
Ragbijaški savez Bosne i Hercegovine
Рагби савез Босне и Херцеговине

Skra

eni naziv je:

RgS BiH
Rgs BiH
PrC БиХ

Član 5.

Sjedište Saveza je u Zenici, Bulever Kralja Tvrtka I broj 5.

Član 6.

Savez može promijeniti svoj naziv, sjedište i znak, a odluku o tome donosi Skupština Saveza, nadpolovičnom većinom svih članova Skupštine.

III CILJEVI I DJELATNOSTI SAVEZA

Član 7.

Ciljevi i djelatnost Saveza su:

- utvrđuje i sprovodi osnove zajedničkih načela u oblasti ragbi sporta u Bosni i Hercegovini;
- podstiče omasovljenjem razvoj i unapređenje ragbi sporta;
- organizira i sprovodi sistem takmičenja;
- brine o propagandi ragbi sporta i izdavačkoj ragbi djelatnosti;
- utvrđuje i sprovodi opće i javne principe stručnog usavršavanja i unapređenja stručnog rada i kadrova u ragbiju (treneri, sudije, delegati, igrači itd);
- vodi jedinstvenu evidenciju i statistiku Saveza, stručnih kadrova, postignutih rezultata i obavlja registraciju igrača;
- osigurava i raspoređuje sredstva namjenjena za finansiranje zadataka koji su od interesa za Savez;
- utvrđuje prijedloge i inicijative u vezi sa donošenjem i ostvarivanjem planova razvoja ragbija u BiH, uz ostvarivanje što povoljnijih uslova;
- organizuje zdravstvenu zaštitu i osiguranje igrača;
- zastupa i predstavlja ragbi kao sport u međunarodnim sportskim organizacijama;
- priprema i osigurava nastupe državnih reprezentacija na zvaničnim međunarodnim takmičenjima;
- informira javnost o rezultatima ragbija u BiH;
- utvrđuje programe razvoja ragbija u skladu sa Strategijom;

-utvrđuje kriterije i dodjelu priznanja i nagrada za ostvarene rezultate;
-ostvaruje saradnju sa nadležnim sportskim i drugim organima i organizacijama Bosne i Hercegovine.

Član 8.

Utvrđene ciljeve Savez ostvaruje na način određen Zakonom, ovim Statutom i drugim općim aktima Saveza.

Za obavljanje svoje djelatnosti iz čl. 7. ovog Statuta Savez može imati svoje urede, kancelarije i druge organizacione oblike. izvan svog sjedišta na cijelom području Bosne i Hercegovine.

Odluku o otvaranju organizacionih oblika iz stava 2. ovog člana donosi skupština Saveza, nadpolovičnom većinom svih članova Skupštine.

Odlukom iz prethodnog stava se uređuje naročito: naziv i sjedište, broj izvršilaca, način obavljanja statutarne djelatnosti, te druga pitanja koja se odnose na njihov rad.

Član 9.

Savez djeluje na području cijele Bosne i Hercegovine.

Savez je član FIRA-Internacionalne amaterske ragbi federacije I IRB-Međunarodni ragbi savez.

Član 10.

Savez može obavljati srodne privredne djelatnosti koje su neposredno povezane sa statutarnim ciljevima iz člana 7. Ovog Statuta (izdavačka djelatnost).

Nesrodne privredne djelatnosti koje nisu neposredno povezane sa statutarnim ciljevima iz člana 7. Ovog Statuta Savez može obavljati samo preko posebno osnovanog pravnog lica u skladu sa Zakonom.

IV POSTUPAK ZA PRIJEM I PRESTANAK ČLANSTVA

Član 11.

Svojstvo člana Saveza može steći svako pravno lice-Ragbi savez koji je registrovan kod nadležnog organa u BiH u oblasti ragbi sporta.

Članovi Saveza su:

-Redovni

-Pridruženi

-Počasni

Redovni članovi Saveza su lica iz stave 1. ovog člana. Odluku o prijemu novih članova donosi Skupština Saveza. Redovni članovi potpisuju izjavu o prihvatanju statuta i ciljeva Saveza.

Pridruženi članovi pristupaju Savezu radi sudjelovanja u realizaciji ciljeva Saveza.

Počasni članovi su lica koja materijalno ili na drugi način pomažu rad Saveza bez prava glasa.

Počasni članovi učestvuju u radu Saveza savjetodavnom funkcijom.

Pridruženi i počasni članovi mogu biti pojedinci i pravna lica.

Naziv počasnog člana dodjeljuje Skupština na prijedlog Upravnog odbora.

O članovima Saveza vodi se evidencija.

Član 12.

Članstvo u Savezu je dobrovoljno.

Član 13.

U slučaju izuzetnih zasluga, osnivačima, donatorima i ostalim članovima Saveza može se dodjeliti priznanje Saveza.

Odluku o tome donosi Upravni odbor Saveza nadpolovičnom većinom glasova svih članova Upravnog odbora, a pismeno priznanje potpisuje Predsjednik Upravnog odbora.

Član 14.

Prava, dužnosti i odgovornosti članova Saveza su:

- da učestvuju u radu Saveza;
- da biraju organe Saveza i imaju svoje predstavnike u organima Saveza;
- da daju primjedbe, prijedloge i sugestije za rad Saveza;
- da postupaju u skladu sa odredbama ovog Statuta i da poštuju i provode odluke, zaključke i preporuke organa Saveza;
- da se zalažu za namicanje sredstava za programe Saveza;
- da paze i čuvaju ugled Saveza;

Članovi Saveza su ravnopravni u ostvarivanju svojih prava i dužnosti.

Član 15.

Članstvo u Savezu prestaje:

- dobrovoljnim istupanjem iz Saveza,
- isključenjem zbog teže povrede pravila Saveza,
- usljed duže neopravdane pasivnosti u radu Saveza,
- prestankom rada Saveza,
- ukoliko član izgubi svojstvo pravnog lica.

Član 16.

Svaki član Saveza može istupiti na osnovu pismene izjave o istupanju koju dostavlja Upravnom odboru.

Kao dan prestanka članstva u Savezu smatra se datum prijema izjave o istupanju.

Član 17.

Član Saveza koji grubo krši Statut Saveza, ne izvršava svoje obaveze prema Savezu ili svojim postupcima nanosi štetu Savezu ili narušava ugled Saveza može biti isključen iz Saveza.

Prije donošenja odluke o isključenju, član Saveza mora biti pismeno obaviješten o prijedlogu za isključenje, kao i o razlozima zbog kojih se predlaže isključenje.

Odluku o prestanku svojstva člana Saveza donosi Upravni odbor.

Član koji je nezadovoljan odlukom iz prethodnog stava može uložiti prigovor Skupštini Saveza u roku od 15 dana od dana prijema obavijesti.

Odluka Skupštine po žalbi je konačna.

V ORGANI SAVEZA

Član 18.

Organi Saveza su:

- Skupština
- Upravni odbor

- Nadzorni odbor
- Generalni sekretar
- Tehnički direktor”

1. SKUPŠTINA SAVEZA

Član 19.

Skupština Saveza je organ upravljanja, koju čine svi članovi Saveza - ragbi klubovi koji imaju pravo glasa, prema delegatskoj zastupljenosti u skladu sa Statutom Saveza.“

Broj delegata koje klubovi mogu delegirati direktno zavisi od broja takmičarskih kategorija koje su u predhodnoj godini učestvovala u Prvenstvu BiH pa tako klub koji je u predhodnoj godini (u odnosu na godinu održavanja Skupštine) u Prvenstvu BiH učestvovao sa:

- 6 kategorija, ima pravo da delegira 4 delegata,
- 5 kategorija, ima pravo da delegira 3 delegata,
- 4 kategorije, ima pravo da delegira 2 delegata,
- 1-3 kategorije, ima pravo da delegira 1 delegata.

Član 20.

Skupština:

- 1* donosi Statut, izmjene i dopune Statuta i druge akte utvrđene ovim Statutom,
- 2* donosi program rada Saveza i osnovne smjernice razvoja ragbija u BiH za period od jedne ili više godina,
- 3* donosi odluku o otvaranju ureda, kancelarija i drugih organizacionih oblika u skladu sa odredbama Statuta,,
- 4* donosi finansijski plan Saveza, razmatra i usvaja finansijski izvještaj i izvještaj o radu Upravnog odbora,
- 5* donosi odluku o promjeni naziva, sjedišta i znaka Saveza,
- 6* donosi odluku o pripajanju, razdvajanju, transformaciji, raspuštanju i prestanku rada, kao i o drugim statusnim promjenama saveza,
- 7* donosi odluku o imenovanju lica ovlaštenih za zastupanje Saveza, predsjednika skupštine i Nadzorni odbor,
- 8* razmatra i usvaja izvještaj koji je podnio Upravni odbor i Nadzorni odbor,
- 9* donosi odluku o sistemu takmičenja na nivou BIH i nižim nivoima,
- 10* donosi odluku o prijemu novih članica u Savez,
- 11* donosi odluku o isključenju članica u drugom stepenu,
- 12* bira i razriješava predsjednika, dopredsjednika i članove Upravnog odbora, generalnog sekretara Saveza, predsjednika i članove Nadzornog odbora,
- 13* uskladjuje pravila igre sa izmjenama i dopunama koje donosi FIRA-A.E.R. i IRB,
- 14* donosi odluku o prestanku rada Saveza i raspodjeli preostale imovine nakon raspuštanja Saveza, obavlja i druge poslove određene ovim Statutom, koji nisu u nadležnosti drugih organa Saveza.

Član 21.

Skupština se sastaje po potrebi, a najmanje jednom u toku kalendarske godine.

Skupštinu saziva Predsjednik Skupštine Saveza najmanje 15 dana prije njenog zasjedanja.

Predsjednik Skupštine Saveza je dužan sazvati Skupštinu kada to zahtjeva najmanje jedna trećina članova Skupštine ili kada to zatraži Upravni odbor.

Ako Predsjednik ne sazove Skupštinu u roku od 30 dana, u slučajevima iz prethodnog stava,

odluku o sazivanju Skupštine donijeće Upravni odbor Saveza.

Član 22.

Ragbi savez u Federaciji BiH delegira ukupno 12 delegata koji su predhodno izabrani od strane ragbi klubova članova Ragbi saveza u Federaciji BiH. Svaki ragbi klub delegira tri delegata. Tako delegirani delegati čine Skupštinu Saveza.

Skupština radi na sjednicama i kvorum je nadpolovična većina svih članova Skupštine, a odluke se donose nadpolovičnom većinom glasova prisutnih članova Skupštine Saveza. Odluke koje imaju statusni karakter (spajanje, pripajanje, transformacija, prestanak rada Saveza) donose se 2/3 većinom glasova svih članova Skupštine.

Član 23.

Radom Skupštine upravlja Predsjednik Skupštine kojeg bira Skupština na period od 4 godine.

-Predsjednik skupštine:

- stara se o organizovanju Skupštine i saziva njene sjednice,
- predlaže dnevni red sjednice,
- predsjedava sjednicama Skupštine,
- potpisuje akte donesene na Skupštini,
- stara se o izvršavanju odluka, zaključaka i drugih akata Skupštine,
- kordinira rad organa i tijela Skupštine,
- vrši i druge poslove koje mu odredi Skupština.

Predsjednik skupštine Saveza u slučaju spriječenosti prisustvovanju Skupštini može pismeno ovlastiti člana Saveza koji će ga zamjeniti u obavljanju poslova upravljanja radom Skupštine. Odluke u Skupštini se donose javnim glasanjem, a samo izuzetno tajnim glasanjem.

2. UPRAVNI ODBOR

Član 24.

Upravni odbor je izvršni organ Saveza.

Upravni odbor ima sedam članova: Predsjednika, 2 dopredsjednika i četiri člana.

Mandat članova Upravnog odbora traje 4 godine.

Član 25.

Upravni odbor svoje sjednice održava redovno jedanput u dva mjeseca, a vanredno po potrebi.

Upravni odbor radi na sjednicama i kvorum za odlučivanje je nadpolovična većina svih članova Upravnog odbora, a punovažno odlučuje nadpolovičnom većinom svih članova Upravnog odbora.

Upravni odbor i svaki njegov član pojedinačno su odgovorni Skupštini.

Član 26.

Upravni odbor Saveza:

- priprema sjednice Skupštine,
- priprema nacrt Statuta, njegove izmjene i dopune i druge akte koje donosi Skupština,
- provodi politiku, zaključke i druge odluke koje je donijela Skupština,
- raspolaže imovinom Saveza,
- donosi kalendar takmičenja u Bosni i Hercegovini i na nižim nivoima u skladu sa

- važećom Odlukom o sistemu takmičenja,
- priprema materijal za sjednicu Skupštine,
 - stara se o izvršenju odluka Skupštine,
 - donosi opšta akta, osim onih iz nadležnosti Skupštine,
 - bira i razriješava članove radnih tijela, komesarijata – komesara.,
 - podnosi izvještaj o radu Skupštini na razmatranje i usvajanje,
 - priprema Finansijski plan i Završni finansijski izvještaj za sjednicu Skupštine,
 - utvrđuje svoj plan, kao i planove rada organa koje imenuje,
 - vrši i druge poslove predviđene ovim Statutom i aktima Saveza,

Član 27.

Članovi Upravnog odbora mogu biti opozvani i prije isteka vremena na koje su izabrani i to:

- na sopstveni zahtjev,
- ako ne prisustvuju sjednici Upravnog odbora tri puta uzastopno bez opravdanih razloga,
- ako svojim radnjama u vezi sa radom Upravnog odbora ruši ugled Saveza,
- kao i u drugim slučajevima predviđenim Zakonom, ovim Statutom i aktima Saveza.

O opozivu člana Upravnog odbora odlučuje Skupština Saveza.

Član 28.

Predsjednika Upravnog odbora bira Skupština Saveza na period od 4 godine.

Predsjednik Upravnog odbora obavlja sljedeće poslove:

- predstavlja i zastupa Savez u pravnom prometu,
- Saziva sjednice Upravnog odbora samoinicijativno ili na zahtjev najmanje jedne trećine članova Upravnog odbora i rukovodi njihovim radom,
- stara se o sprovođenju programa rada, odluka, zaključaka i smjernica Skupštine Saveza,
- stara se o provođenju planova rada Upravnog odbora,
- potpisuje akte koje donosi Upravni odbor,
- potpisuje naloge kod finansijskog poslovanja,
- podnosi godišnji izvještaj o svom radu i radu Upravnog odbora Skupštini Saveza na razmatranje i usvajanje,
- u ime i za račun Saveza može tražiti i prikupljati finansijska sredstva - donacije od privrednih subjekata u i van BiH, te od državnih institucija BiH, na osnovu popisa potencijalnih donatora, kojeg odobrava Upravni odbor,
- odgovoran je za zakonitost i poslovanje Saveza,
- vrši i druge poslove koje mu odredi Skupština.

U slučaju spriječenosti Predsjednika Upravnog odbora mijenja jedan od dopredsjednika kojeg ovlasti sam Predsjednik posebnom odlukom. U tom slučaju dopredsjednik obavlja poslove iz stava 1. ovog člana i poslove zastupanja i predstavljanja Saveza u pravnom prometu.

Član 29.

Predsjednik Upravnog odbora može biti opozvan i prije isteka vremena na koji je izabran:

- na sopstveni zahtjev,
- ako pravilno ne obavlja poslove i zadatke Predsjednika Upravnog odbora,
- u drugim slučajevima predviđenim Zakonom i ovim Statutom.

Član 30.

Inicijativu o opozivu Predsjednika Upravnog odbora može dati većina članova Skupštine.

3. GENERALNI SEKRETAR

Član 31.

Savez ima generalnog sekretara kojeg imenuje Skupština Saveza na period od 4 godine.

Član 32.

Generalni sekretar obavlja sljedeće:

- 15* prati i sprovodi realizaciju odluka organa, tijela i komisija Upravnog odbora,
- 16* priprema i organizuje administrativno-tehničku obradu i distribuciju akata Saveza i Upravnog odbora, prisustvuje sjednicama svih organa i tijela Saveza,
- 17* čuva i stara se o uredskoj opremi Saveza,
- 18* sačinjava prijedlog i daje na usvajanje Upravnom odboru Strateški plan Saveza, kao i razvojni plana Saveza, te sudjeluje u provodjenju istih,
- 19* vrši druge poslove u skladu sa aktima Saveza.

Član 33.

Generalni sekretar može biti opozvan i prije isteka vremena na koje je izabran i to:

- na sopstveni zahtjev,
- ako svojim radnjama ruši ugled Saveza i Upravnog odbora,
- ako ne postupa u skladu sa uputama Upravnog odbora,
- kao i u drugim slučajevima predviđenim Zakonom, ovim Statutom i aktima Saveza.

Član 33.a

Savez ima tehničkog direktora kojeg imenuje Upravni odbor Saveza na period od 4 godine.

Tehnički direktor obavlja sljedeće:

- Korespodencija i saradnja s klubovima RgS-a BiH, te ostalim ragbi savezima,
- Vođenje svih klupskih natjecanja u okviru RgS BiH zajedno sa Komesarom za takmičenje RgS BiH,
- Promjena i implementiranje Propozicija natjecanja u svim kategorijama.
- Prisustvuje IRB i FIRA-AER seminarima,
- Angažman na pripremi i podnošenju godišnje aplikacije za dodjelu sredstava od IRB/FIRA-AER (IRB Development Grants Programme),
- Podrška u održavanju svih seminara u BiH organiziranih od strane FIRA-AER i/ili RgS-a BiH,
- Angažiranje i podrška u radu svih reprezentativnih selekcija,
- Vođenje poslova izdavanja i korištenja opreme Saveza za sve reprezentacije, uključujući i opremu iz donacija za klubove (SOS Kit Aid),
- Administrativno tehničke poslove

4. NADZORNI ODBOR

Član 34.

Nadzorni odbor je nadzorni organ, ovlašćen za nadzor korištenja sredstava Saveza, prema pravilima za ostvarivanje, korištenje i raspolaganjem sredstvima Saveza, utvrdjenim ovim Statutom i važećim propisima.

Nadzorni odbor čine predsjednik i dva člana, koje bira Skupština na period od 4 godine.

Nadzorni odbor radi na sjednicama i kvorum za odlučivanje je nadpolovična većina svih

članova Nadzornog odbora, a punovažno odlučuje nadpolovičnom većinom ukupnog broja prisutnih članova Nadzornog odbora.
O svom radu Nadzorni odbor podnosi izvještaj Skupštini, a najmanje jednom godišnje.

5. KOMESARIJAT- KOMESARI

Član 35.

Radi izvršavanja svojih odluka i odluka Skupštine, kao i rješavanja konkretnih zadataka, Upravni odbor formira komesarijat.
Djelokrug rada i nadležnosti Komesarijata-komesara određeni su posebnim pravilima.

Član 36.

Komesarijat sačinjavaju komesari koji su odgovorni za pojedine oblasti djelovanja u Savezu, i to:

- takmičenje
- zdravstvo
- marketing, propagandu i informacije
- disciplinsko-prekršajna i administrativno-tehnička pitanja
- za druge oblasti prema ukazanim potrebama

Komesari mogu u svrhu izvršenja svojih poslova da angažuju i druga lica prema njihovoj stručnosti, znanju, iskustvu i afinitetu.

Član 37.

Komesarijat je za svoj rad odgovoran Upravnom odboru. Članovi komesarijata imenuju se na mandatni period od 4 godine uz mogućnost ponovnog izbora i razrješavanja sa funkcije prema odluci Upravnog odbora.

Član 37. a

- Savez se može udruživati u druge saveze, udruženja i asocijacije u cilju razvoja ragbi sporta
- Odluku o udruživanju donosi Skupština Saveza nadpolovičnom većinom.

Član 37. b

- Savez je punopravan član Olimpijskog komiteta BiH.
- Savez prihvata Statut Olimpijskog komiteta Bosne i Hercegovine kao krovne organizacije.
- Savez prihvata i sprovodi odluke i zaključke tijela Olimpijskog komiteta Bosne i Hercegovine, te odgovara za njihovo izvršenje.
- Savez prihvata i priznaje načela i pravila Olimpijske povelje, Etičkog kodeksa i Anti-doping kodeksa Međunarodnog olimpijskog komiteta.
- Savez je obavezan uskladiti svoj Statut sa Statutom Olimpijskog komiteta Bosne i Hercegovine i slijediti sve promjene do kojih, eventualno, dođe u Statutu Olimpijskog komiteta Bosne i Hercegovine.
- Savez će se pridržavati mjera i sankcija koje donesu tijela Olimpijskog komiteta Bosne i Hercegovine.

VI SREDSTVA ZA RAD SAVEZA

Član 38.

Sredstva Saveza su:

- novčana sredstva,
- nepokretna i pokretna imovina (sportska oprema, rekviziti, kancelarijska oprema i namještaj, suveniri, razna oprema i sl.)

Član 39.

Savez može ostvariti sredstva:

- iz državnih subvencija i ugovora sa državom, javnim institucijama, domaćim i stranim fizičkim i pravnim licima,
- iz dobrovoljnih priloga i poklona javnih institucija, fizičkih i pravnih osoba, kako inostranih tako i domaćih, u gotovini, uslugama ili imovini bilo koje vrste,
- iz sredstava ostvarenih od strane osnovanih subjekata za privredu i druge djelatnosti Saveza, a u skladu sa propisima,
- iz prihoda od kamata, dividendi, dobiti od kapitala, zakupnina, honorara i sličnih izvora pasivnog prihoda,
- od prava na RTV prijenos ragbi utakmica, ulaznica i sl.,
- od igara na sreću u skladu sa propisima,
- od udruženih članica,
- od članarina - kotizacija,
- iz prihoda stečenih kroz ostvarivanje ciljeva I aktivnosti Saveza, kako je određeno Statutom, kao i iz drugih izvora finansiranja u skladu sa propisima.

Član 40.

Obim, namjera i raspodjela finansijskih sredstava utvrđuje se Finansijskim planom Saveza kojeg donosi Skupština, na prijedlog Upravnog odbora.

O upotrebi sredstava, u skladu sa finansijskim planom odlučuje Upravni odbor.

Naredbodavac za izvršavanje Finansijskog plana i Programa rada je Predsjednik Upravnog odbora.

Član 41.

Sredstva Saveza se mogu upotrebljavati isključivo radi ostvarivanja ciljeva i djelatnosti Saveza.

Član 42.

Nadzor nad upotrebom i raspolaganjem sredstava Saveza vrši Nadzorni odbor.

Predsjednik Nadzornog odbora je dužan o pravilnosti i ispravnosti trošenja sredstava Saveza izvještavati Skupštinu najmanje jednom u tri mjeseca.

O svakoj uočenoj nezakovitosti u trošenju i raspolaganju sredstvima Nadzorni odbor je dužan odmah izvjestiti predsjednika Skupštine koji će u roku od 5 dana sazvati vanrednu Skupštinu.

VII JAVNOST RADA

Član 43.

Rad organa, komisija i izabranih funkcionera u Savezu je javan.

Javnost rada Saveza se ostvaruje na način utvrđen Zakonom i ovim Statutom.

Član 44.

Javnost rada se obezbjedjuje:

- 20* javnim održavanjem sjednica,
- 21* blagovremenim i objektivnim informisanjem svih članica o radu Saveza,
- 22* stalnom saradnjom sa predstavnicima sredstava javnog informisanja,
- 23* objavljivanjem odluka organa Saveza,
- 24* primjena ostalih dostupnih oblika upoznavanja javnosti.

Član 45.

Članovi Saveza imaju pravo da budu redovno informisani o radu svih organa Saveza. Za informisanje članova Saveza zadužen je predsjednik Upravnog odbora.

Član 46.

Izuzetno općim aktom koji donosi Upravni odbor može se utvrditi da pojedine informacije, podaci i isprave predstavljaju poslovnu tajnu. Istim aktom se mogu utvrditi odgovorna lica za korištenje i zaštitu informacija koje imaju karakter poslovne tajne. Za poslovnu tajnu mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

VII POSTUPAK ZA DONOŠENJE STATUTA, IZMJENE I DOPUNE STATUTA, OVLAŠTENJE I NAČIN DONOŠENJA DRUGIH OPĆIH AKATA

Član 47.

Osnovni opći akt Saveza je Statut. Savez može donositi i druge opće akte: pravilnike, odluke i poslovnike. Opći akti moraju biti saglasni Zakonu i Statutu. Pojedinačni akti su odluke, zaključci, uputstva i mišljenja.

Član 48.

Na sastancima organa upravljanja i njegovim komisijama obavezno se sačinjavaju zapisnici. Zapisnici moraju odražavati tok rada sastanka i sadržavati odluke koje su donijeli organi upravljanja na svojim sjednicama. Zapisnici moraju biti potpisani. Inicijativu za izmjene i dopune Statuta može podnijeti svaki član Saveza. Inicijativa se podnosi Upravnom odboru pismenim putem i sa odgovarajućim obrazloženjem. Utvrđeni prijedlog Statuta dostavlja se na razmatranje i usvajanje Skupštini, najmanje osam dana prije održavanja Skupštine.

Član 49.

O izmjenama i dopunama Statuta odlučuje Skupština nadpolovičnom većinom glasova svih članova Skupštine. Predsjednik Skupštine potpisuje odluku o izmjenama i dopunama statuta koji se smatraju originalom i čuvaju u arhivi Saveza.

VIII OPIS, OBLIK I SADRŽAJ PEČATA I ZNAKA SAVEZA

Član 50.

Pe

at Saveza je okruglog oblika prečnika 3cm u kome je puni naziv: Ragbi savez Bosne i Hercegovine, a u sredini je sjedište: Zenica i znak Saveza.

Savez ima svoj znak:Znak Saveza je Mapa BiH sa žutom podlogom, a u sredini ragbi lopta na bijeloj podlozi gdje piše: RAGBIH

IX ZASTUPANJE I PREDSTAVLJANJE SAVEZA

Član 51.

U odnosima sa trećim licima Savez zastupa Predsjednik odbora i dopredsjednici. U postupcima u kojima Savez učestvuje kao stranka radi ostvarivanja svojih prava, dužnosti i odgovornosti pred nadležnim organima, predsjednik Upravnog odbora može dati pismenu punomoć za zastupanje advokatu ili drugom stručnom licu.

X USLOVI POSTUPKA ZA PRIPAJANJE, RAZDVAJANJE, TRANSFORMACIJU I PRESTANAK RADA SAVEZA

Član 52.

Savez se može spojiti, razdvojiti ili transformirati u drugo udruženje ili fondaciju u skladu sa Zakonom.

Odluku iz prethodnog stava donosi Skupština dvotrećinskom većinom glasova svih članova Skupštine.

Ovom odlukom reguliše se naročito: naziv i sjedište, te podjela imovine, prava i obaveza, kao i druga pitanja koja se odnose na statusne promjene Saveza.

Član 53.

Savez prestaje sa radom u slijedećim slučajevima:

-ako Skupština donese odluku o prestanku ili odluku o pripajanju, razdvajanju ili transformaciji Saveza;

-ako je proteklo dvostruko više vremena od vremena utvrđenog u čl. 21. Statuta za održavanje Skupštine, a Skupština Saveza nije održana i

-ako se broj ragbi klubova-članova Saveza smanji ispod broja tri.

Skupština Saveza može donijeti odluku o dobrovoljnom prestanku dvotrećinskom većinom glasova svih članova Skupštine.

Član 54.

Savez prestaje sa radom po sili zakona, u skladu sa odredbama čl. 51. i 52. Zakona.

Savez je obavezan svaku statusnu promjenu prijaviti nadležnom ministarstvu u roku utvrđenom zakonom.

XI PRAVILA ZA RASPODJELU PREOSTALE IMOVINE U SLUČAJU PRESTANKA RADA SAVEZA

Član 55.

Istovremeno sa odlukom o prestanku rada Saveza Skupština donosi plan likvidacije Saveza, kojim se utvrđuje raspored imovine, prava i obaveze Saveza.

Skupština Saveza imenuje likvidatora čija je dužnost da se stara o izvršenju plana likvidacije i ovlašten je da zastupa Savez u postupku likvidacije i u postupku podnošenja zahtjeva za prijavu prestanka rada Saveza nadležnim organima.
Imovina kod raspuštanja Saveza, nakon izmirenja svih zakonskih obaveza dodjelit će se nekom drugom udruženju koje obavlja iste ili slične djelatnosti, a na osnovu odluke Skupštine.

XII ZAVRŠNE ODREDBE

Član 56.

Tumačenje odredaba ovog Statuta daje Skupština.

Član 57.

Statut stupa na snagu danom donošenja, a primjenjivat će se od dana upisa u registar kod nadležnog ministarstva.

BROJ: 2/08
ZENICA, 25.08.2008. godine

Predsjednik Skupštine:

Zehrudin Mušinović